

## REGLUGERÐ

### fyrir Landsvirkjun.

#### I. KAFLI.

##### 1. gr.

#### Eigendur, stofnun.

Landsvirkjun er sameignarfyrirtæki ríkissjóðs, Reykjavíkurborgar og Akureyrarbæjar. Fyrirtækið var stofnsett hinn 1. júlí 1965 á grundvelli laga nr. 59 20. maí 1965 um Landsvirkjun, með sameignarsamningi dags. þann dag milli ríkisstjórnar Íslands og borgarstjórnar Reykjavíkur, og voru ríkissjóður og Reykjavíkurborg stofnendur fyrirtækisins og eigendur þess að jöfnum hlutum.

Með sameignarsamningi milli ríkisstjórnar Íslands, Reykjavíkurborgar og Akureyrarbæjar dags. 27. febrúar 1981, er gekk í gildi hinn 1. júlí 1983 og kom í stað hins fyrri sameignarsamnings hefur virkjanafyrirtækið Laxárvirkjun, sem var eign Akureyrarbæjar og ríkissjóðs á grundvelli laga nr. 60 20. maí 1965 um Laxárvirkjun, verið sameinað Landsvirkjun ásamt ríkissjóði og Reykjavíkurborg.

Með samningi dags. 11. ágúst 1982 milli ríkisstjórnar Íslands og Landsvirkjunar um yfirtöku á byggðalínum og um virkjunarheimildir norðanlands og austan, sem veittar voru Landsvirkjun á grundvelli laga nr. 60 4. júní 1981 um raforkuver, hefur orkusvæði Landsvirkjunar verið fært út þannig, að það nái til allra landshluta.

Þann 23. mars 1983 voru staðfest sem lög frá Alþingi lög nr. 42 1983 um Landsvirkjun. Lögin tóku gildi hinn 15. apríl 1983, og féllu lög nr. 59 20. maí 1965 um Landsvirkjun úr gildi sama dag og lög nr. 60 20. maí 1965 um Laxárvirkjun hinn 1. júlí 1983. Féllu þá einnig úr gildi önnur ákvæði í lögum og reglugerðum sem brjóta í bága við hin nýju lög, en Landsvirkjun er nú skipulögð og rekin í samræmi við ákvæði þeirra.

Landsvirkjun er sjálfstæður réttaraðili og hefur sjálfstæðan fjárhag og reikningshald. Heimili fyrirtækisins og varnarþing er í Reykjavík. Aðalskrifstofa Landsvirkjunar er í Reykjavík, en svæðisskrifstofa fyrirtækisins vegna Norður- og Austurlands á Akureyri. Eignarhlutdeild eigenda í fyrirtækinu er þannig, frá og með 1. júlí 1983:

|                           |         |
|---------------------------|---------|
| Ríkissjóður Íslands ..... | 50,000% |
| Reykjavíkurborg .....     | 44,525% |
| Akureyrarbær .....        | 5,475%  |

Hver eigandi um sig er í einfaldri ábyrgð fyrir öllum skuldbindingum fyrirtækisins, en um innbyrðis ábyrgð þeirra fer eftir eignarhlutföllum.

Eiganda er óheimilt að ganga úr fyrirtækinu án samþykkis meðeigendanna.

## 2. gr.

**Tilgangur og verkefni.**

Tilgangur og verkefni Landsvirkjunar eru:

1. Að vinna, flytja og selja í heildsölu raforku til almenningsrafveitna svo og til iðjufyrirtækja samkvæmt sérstökum samningum að svo miklu leyti sem almenningsrafveitur hafa ekki milligöngu um slíka raforkusölu. Einnig að selja varmaorku frá aflstöðvum sínum þar sem hún fellur til.
2. Að byggja og reka raforkuver og meginstofnlínukerfi landsins.
3. Að annast áætlanagerð um ný raforkuver og stofnlínur á orkusvæði Landsvirkjunar.
4. Að vinna að því, í samvinnu við rafveitur á orkusvæði sínu, að raforka komi í stað annarra orkugjafa eftir því sem hagkvæmt er talið.
5. Að hafa með viðunandi öryggi tiltæka nægilega raforku til þess að anna þörfum viðskiptavina sinna á hverjum tíma.

Landsvirkjun ber að gera allar nauðsynlegar ráðstafanir til þess að tilgangi fyrirtækisins verði náð.

Við áætlanagerð um nýjar aflstöðvar samkvæmt 3. tölul. hefur Landsvirkjun samvinnu við Orkustofnun, sem skal í aðalatriðum vera þannig að Orkustofnun annist grundvallarathuganir og almennar rannsóknir til undirbúnings ákvarðana um virkjunarstaði, en Landsvirkjun ákveður að fengnum nauðsynlegum heimildum hvar virkjað skuli og hvenær, og hún annast frekari rannsóknir á virkjunarstað, áætlanagerð og framkvæmdir.

Landsvirkjun ber að gera skammtíma- og langtímaáætlanir um virkjanaframkvæmdir sínar, fjármögnun þeirra og rekstur fyrirtækisins í heild.

## 3. gr.

**Orkusvæði.**

Orkusvæði Landsvirkjunar er landið allt eftir því sem raforkuver hennar og stofnlínukerfi spanna.

Landsvirkjun annast alla raforkuvinnslu fyrir orkusvæði sitt að undanskilinni þeirri raforkuvinnslu, sem öðrum aðilum er heimiluð lögum samkvæmt.

Afhendingarstaðir rafmagns frá Landsvirkjun eru þessir:

**a. Aflstöðvar fyrirtækisins:**

Ljósafofsstöð  
Búrfellsstöð  
Laxárvirkjun  
Gufustöðin í Bjarnarflagi.

**b. Eftirfarandi aðveitustöðvar, sem Landsvirkjun á og rekur að hluta eða öllu leyti:**

Aðveitustöð við Elliðaár í Reykjavík  
Aðveitustöð við Korpu hjá Reykjavík  
Aðveitustöð á Brennimeil í Hvalfirði  
Aðveitustöð að Vatnshömrum í Borgarfirði  
Aðveitustöð að Hrutatungu í Hrutafirði  
Aðveitustöð við Laxárvatn í Húnavatnssýslu  
Aðveitustöð við Varmahlíð í Skagafirði  
Aðveitustöð við Rangárvelli á Akureyri  
Aðveitustöð að Hryggstekk í Skriðdal  
Aðveitustöð að Hólum í Hornafirði  
Aðveitustöð að Glerárskógum í Dalasýslu  
Aðveitustöð að Geiradal í Austur-Barðastrandarsýslu  
Aðveitustöð við Mjólka í Arnarfirði.

c. Aðveitustöð Rafmagnsveitna ríkisins að Teigarhorni við Berufjörð.

d. Aðveitustöð ISAL í Straumsvík.

Aðveitustöð Íslenska járnblendifélagsins hf. að Grundartanga.

e. Aðrir afhendingarstaðir, eftir því sem stjórn Landsvirkjunar ákveður.

Stjórn Landsvirkjunar ákveður breytingar á afhendingarstöðum, og er Landsvirkjun heimilt að reisa og reka orkuveitur til að tengja orkuver sín við landskerfið og bæta við þær eftir þörfum.

Landsvirkjun er heimilt með samningum að kaupa raforkuver og stofnlínakerfi af öðrum aðilum og starfrækja þessi mannvirki.

Landsvirkjun ber að hafa forgöngu um virkjanir á orkusvæði sínu svo að tryggt verði að afl- og orkuþörf viðskiptavina fyrirtækisins verði ávallt fullnægt. Einnig ber Landsvirkjun að kappkosta styrkingu og frekari uppbyggingu meginstofnlínakerfis síns með það fyrir augum að tryggja sem best rekstraröryggi Landsvirkjunarkerfisins í heild.

4. gr.

#### **Eignir.**

Landsvirkjun er eigandi raforkuvera, stofnlína, annarra mannvirkja, vatnsréttinda, landsréttinda og búnaðar ýmiss konar, sem fyrirtækið hefur sjálft komið upp á starfsferli sínum eða eignast með eftirfarandi hætti fyrir tilhlutan eignaraðila eða með samningum við þá:

- a. Með yfirtöku á eignum Sogsvirkjunar, vatnsréttindum við Sog og í Þjórsá og Tungnaá og fleiri eignum, sem lagðar voru fram við stofnun fyrirtækisins og vegna virkjana í Tungnaá samkvæmt sameignarsamningi stofnenda frá 1. júlí 1965 og lögum nr. 59/1965 um Landsvirkjun.
- b. Við sameiningu Laxárvirkjunar við Landsvirkjun samkvæmt sameignarsamningi frá 27. febrúar 1981 milli ríkisstjórnar Íslands, Reykjavíkurborgar og Akureyrarbæjar.
- c. Við yfirtöku á byggðalínunum, aðveitustöðvum og undirbúningi að virkjanaframkvæmdum samkvæmt samningi milli ríkisstjórnar Íslands og Landsvirkjunar frá 11. ágúst 1982.
- d. Með framkvæmdum og kaupum eftir 1. júlí 1983.

5. gr.

#### **Leyfi ráðherra til framkvæmda**

Til byggingar nýrra raforkuvera og meginstofnlína þarf Landsvirkjun leyfi ráðherra þess sem fer með orkumál. Áður en byrjað er á nýjum mannvirkjum, hvort heldur eru raforkuver eða meginstofnlínur, skal Landsvirkjun senda ráðherra þeim, sem fer með orkumál, uppdrætti af hinum fyrirhugaðu mannvirkjum, ásamt lýsingu á þeim.

Getur ráðherra krafist þeirra breytinga á fyrirhugaðri tilhögun mannvirkja sem nauðsynlegar kunna að þykja vegna almenningshagsmuna.

## II. KAFLI

6. gr.

#### **Stjórn**

Stjórn Landsvirkjunar er skipuð níu mönnum. Sameinað Alþingi kýs fjóra stjórnarmenn hlutfallskosningu, borgarstjórn Reykjavíkur kýs þrjár stjórnarmenn og bæjarstjórn Akureyrar kýs einn. Sameiginlega skipa eignaraðilar níunda manninn og skal hann vera formaður stjórnarinnar. Nái eignaraðilar ekki samkomulagi um skipun formanns, skal hann skipaður af Hæstarétti.

Varamaður fyrir hvern stjórnarmann skal kosinn eða skipaður á sama hátt og aðalmaður. Tekur hann sæti aðalmanns í forföllum hans.

Ráðherra sá, sem fer með orkumál, tilnefndir einn mann ásamt varamanni til setu á fundum stjórnar og skal hann hafa þar málfrelsi og tillögurétt.

Frá 1. júlí 1983 að telja er kjörtímabil stjórnarinnar fjögur ár.

Stjórnarmenn Landsvirkjunar hafa réttindi og skyldur opinberra sýslunarmanna.

#### 7. gr.

##### **Stjórnarfundir**

Stjórn Landsvirkjunar ákveður sjálf starfshætti sína eða fundarhöld. Hún skal þó ekki halda fundi sjaldnar en einu sinni í mánuði að jafnaði. Skyld er að halda fund, þegar tveir stjórnarmenn eða einhver eignaraðila óskar þess. Stjórnarfundur er lögmætur, ef formaður sækir hann og fimm aðrir stjórnarmenn. Nú verður fundur ólögmætur og skal þá boða fund á ný innan 14 daga og geta þess í fundarboði, að hann verði haldinn í stað þess fundar, er áður var boðað til og eigi varð lögmætur. Er hinn síðari fundur þá lögmætur og ályktunarfær um þau mál, er ræða átti í fyrri fundinum. Meirihluti atkvæða ræður úrslitum máls, en séu atkvæði jöfn, ræður atkvæði formanns.

Forstjóri og aðstoðarforstjóri skulu sitja stjórnarfundum og hafa þar málfrelsi og tillögurétt.

Halda skal sérstaka gerðabók um fundi stjórnar Landsvirkjunar og er heimilt að ráða sérstakan mann utan stjórnar til að færa gerðarbókina. Í gerðarbók skal getið, hvar og hvenær fundur sé haldinn svo og hverjir sitji fundinn. Þar skal og greint í stuttu máli frá þeim málum, sem tekin eru fyrir á fundi og hverja afgreiðslu þau fá. Hver stjórnarmaður á rétt á því, að sérstaklega séu bókaðar eftir honum stuttar athugasemdir svo og forstjóri, aðstoðarforstjóri og fulltrúi ráðherra orkumála. Fundargerðir skulu bornar upp til samþykktar og undirritaðar af þeim stórnarmönnum, sem fund sitja.

Starfskjör stjórnarmanna ákveðast sameiginlega af ráðherra, borgarstjóra Reykjavíkur og bæjarstjóra Akureyrar að fengnum tillögum stjórnarinnar.

#### 8. gr.

##### **Verksvið stjórnar**

Stjórn Landsvirkjunar hefur á hendi yfirstjórn á allri starfsemi Landsvirkjunar. Í því felst meðal annars:

1. Að gæta hagsmuna fyrirtækisins í hvívetna og marka heildarstefnu þess á hverjum tíma.
2. Að ákveða heildarskipulag Landsvirkjunar og ráða forstjóra hennar og aðra fyrirsvarsmenn fyrirtækisins, sbr. 9. gr. þessarar reglugerðar.
3. Að taka ákvarðanir um byggingu nýrra aflstöðva og aðalorkuveitna og um aðrar framkvæmdir og starfsemi Landsvirkjunar.
4. Að taka lán og gefa út skuldabréf í innlendri og erlendri mynt og gefa út aðrar ábyrgðaryfirlýsingar í þágu fyrirtækisins og veðsetja eignir þess í sama skyni svo sem lög heimila hverju sinni.
5. Að marka fjármálastefnu Landsvirkjunar og ákveða heildsöluverð hennar á rafmagni, sbr. 13. gr. þessarar reglugerðar. Stjórn Landsvirkjunar setur gjaldskrá og almenna skilmála um sölu háspennnts rafmagns og gerir rafmagnssamninga við viðskiptavinum hennar, sbr. 16. gr. þessarar reglugerðar.

Til að skuldbinda fyrirtækið þarf undirskrift stjórnarformanns og fjögurra stjórnarmanna. Þó getur stjórnin veitt færri stjórnarmönnum svo og mönnum utan stjórnar umboð til að skuldbinda fyrirtækið, þegar sérstaklega stendur á.

Stjórn Landsvirkjunar veitir prókúruumboð fyrir Landsvirkjun. Forstjóri skal hafa slíkt umboð, en heimilt er einnig að veita öðrum starfsmönnum fyrirtækisins prókúruumboð ef þörf krefur að dómi stjórnarinnar. Prókúruumboð þessi skulu skráð.

## 9. gr.

**Fastráðnir starfsmenn**

Stjórn Landsvirkjunar ræður forstjóra, er veitir fyrirtækinu forstöðu, og setur honum erindisbréf. Hún ræður einnig aðstoðarforstjóra fyrirtækisins, svæðisstjóra fyrir Norður- og Austurland, skrifstofustjóra, rekstrarstjóra, byggingarstjóra og forstöðumann verkfræðideildar svo og aðra hliðstæða starfsmenn þess að fengnum tillögum forstjóra. Aðstoðarforstjóri er staðgengill forstjóra í forföllum hans.

Forstjóri ræður aðra starfsmenn Landsvirkjunar. Stjórnin setur starfsreglur fyrir starfsmenn að fengnum tillögum forstjóra og semur um starfskjör þeirra.

Fastráðnir starfsmenn Landsvirkjunar hafa réttindi og skyldur opinberra sýslunarmanna.

Fastráðnir starfsmenn Landsvirkjunar eiga rétt á aðild að Lífeyrissjóði starfsmanna ríkisins, enda sé ekki um aðra lífeyrissjóðsaðild að ræða samkvæmt hlutadeigandi kjarasamningum. Þeir fastir starfsmenn, sem hinn 1. júlí 1983 eru aðilar að öðrum lífeyrissjóðum, eiga rétt á að velja á milli áframhaldandi aðildar þar og aðildar að Lífeyrissjóði starfsmanna ríkisins.

## 10. gr.

**Verksvið forstjóra**

Forstjóri hefur á hendi framkvæmd stefnu stjórnar Landsvirkjunar. Hann annast allan daglegan rekstur fyrirtækisins, allar framkvæmdir þess og undirbúning þeirra, sjóðvörslu og reikningshald. Forstjóri skal ekki taka að sér störf í þágu annarra en Landsvirkjunar, nema með leyfi stjórnar. Hann getur falið öðrum aðilum framkvæmd tiltekinna verkefna í umboði sínu og í samræmi við þær reglur, sem stjórnin kann að setja um slíkt. Forstjórinn skal eiga sæti á stjórnarfundum og hafa þar málfrelsi og tillögurétt, nema tekin séu fyrir mál, sem varða hann persónulega. Forstjóri ræður starfsmenn Landsvirkjunar og segir þeim upp, sbr. 9. gr.

## 11. gr.

**Ársfundur**

Halda skal í aprílmánuði ár hvert ársfund Landsvirkjunar. Stjórn fyrirtækisins ákveður fundardag og fundarstað og boðar til fundarins með eigi minna en 30 daga fyrirvara, með bréfi eða skeyti til þeirra aðila, er skipa fulltrúa á fundinn.

Fulltrúar á ársfundi skulu vera fjórir menn tilnefndir af ráðherra orkumála, fjórir menn kosnir af Reykjavíkurborg, fjórir menn kosnir af Akureyrarbæ og fjórir kosnir á aðalfundi hverra hinna einstöku landshlutasamtaka sveitarfélaga. Skal kosning eða tilnefning vera til eins árs og fara fram svo tímanlega, að unnt sé að tilkynna stjórn Landsvirkjunar nöfn fulltrúanna eigi síðar en 14 dögum fyrir fundinn.

Landsvirkjun greiðir kostnað við ársfundinn eftir nánari ákvörðun stjórnar Landsvirkjunar.

Varamenn jafnmargir skulu skipaðir eða kosnir á sama hátt og aðalfulltrúar.

Stjórn Landsvirkjunar og forstjóri skulu sitja ársfundinn svo og þeir sem stjórnin býður sérstaklega til fundarins. Í þeim hópi skal vera a. m. k. einn fulltrúi frá hverjum þingflokki. Ennfremur skulu sitja ársfundinn þeir starfsmenn Landsvirkjunar sem forstjóri tilnefnir.

## 12. gr.

**Starfshættir ársfunda**

Á ársfundi skal leggja fram ársreikninga Landsvirkjunar fyrir liðið ár og kynna fjárhagsafkomu fyrirtækisins. Einnig skal gera grein fyrir framkvæmdum á næstliðnu og yfirstandandi ári og þeim framkvæmda- og markaðsáætlunum, sem unnið er eftir.

Senda skal eignaraðilum framangreindar áætlanir til kynningar a. m. k. einum mánuði fyrir ársfund.

Á fundinum skal ræða virkjun orkulinda landsins eða einstakra landshluta og um dreifingu og nýtingu raforkuframleiðslunnar.

Loks skal taka fyrir önnur mál.

Óski fulltrúi á ársfundi að taka til meðferðar sérstakt umræðuefni, undir dagskrárliðnum önnur mál, er varðar málefni Landsvirkjunar, skal hann tilkynna það skrifstofu Landsvirkjunar með minnst 1 viku fyrirvara og skal þá geta þess í dagskrá fundarins, sem dreifa skal á fundinum.

Ársfundur gerir ekki ályktanir.

Ársfundur er lögmætur, ef löglega er til hans boðað. Stjórnarformaður setur fundinn og stýrir kjöri fundarstjóra og fundarritara. Halda skal gerðabók fyrir ársfundinn þar sem getið er hvar og hvenær fundur sé haldinn og hverjir sitji hann og greint í stuttu máli frá þeim umræðum, sem fara fram á fundinum.

### III. KAFLI

#### 13. gr.

#### **Fjármálaákvæði**

Stjórn Landsvirkjunar setur, að fenginni tillögu Þjóðhagsstofnunar, gjaldskrá fyrir Landsvirkjun. Í gjaldskrá skal raforkuverðið við það miðað að eðlilegur afrakstur fáiast af því fjármagni sem á hverjum tíma er bundið í rekstri fyrirtækisins. Einnig skal að því stefnt að fyrirtækið skili nægilegum greiðsluafgangi til þess að það geti jafnan með eigin fjármagni og hæfilegum lántökum tryggt notendum sínum næga raforku. Sama gjaldskrá skal gilda um sölu rafmagns til almenningsrafveitna á öllum afhendingarstöðum Landsvirkjunar.

Stjórn Landsvirkjunar tekur ákvörðun um ráðstöfun tekna samkvæmt rekstrarreikningi. Landsvirkjun greiðir eigendum sínum arð af sérstökum eiginfjárframlögum, sem þeir hafa lagt fram og munu leggja fram til fyrirtækisins, sbr. 5. gr. laga nr. 42/1983 um Landsvirkjun og 14. gr. sameignarsamnings frá 27. febrúar 1981. Framlög þessi skulu framreiknuð til verðlags hvers tíma samkvæmt byggingarvísitölu og ákveður stjórnin arðgreiðsluna sem hundraðshluta þeirrar fjárhæðar, með hliðsjón af afkomu fyrirtækisins.

Stjórn Landsvirkjunar ákveður afskriftartíma eigna og er heimilt að ákveða afskriftir með hliðsjón af endurnýjunarverði og taka tillit til afborgana lána við ákvörðun heildsöluverðs á rafmagni frá Landsvirkjun, ef afborganir eru hærri en afskriftir. Við gjaldskrárákvarðanir og í samningum um raforkuverð ber stjórn Landsvirkjunar að reikna vexti af eigin fé fyrirtækisins. Forstjóri semur fyrir hvert reikningsár fjárhagsáætlun fyrir Landsvirkjun og leggur hana fyrir stjórnina til samþykktar eigi síðar en 1. nóvember árið áður, en stjórnin sendir samþykka áætlun til eigenda Landsvirkjunar eigi síðar en 1. desember.

#### 14. gr.

#### **Lántökur**

Landsvirkjun er heimilt að taka lán til þarfa fyrirtækisins og að taka ábyrgð á greiðslum og öðrum skuldbindingum í sama skyni, sbr. 4. tölul. 8. gr. Að því leyti, sem nýjar skuldbindingar og ábyrgðir fara fram úr 5% af höfuðstól (bókfærðu eigin fé í lok næstliðins árs) á ári hverju, þarf Landsvirkjun að leita samþykkis eignaraðila til að tryggja ábyrgð þeirra skv. 1. gr., sbr. 14. gr. laga nr. 42/1983 um Landsvirkjun.

Af hálfu ríkisins þurfa ráðherrar orku- og fjármála að staðfesta slíkt samþykki.

#### 15. gr.

#### **Reikningshald og endurskoðun**

Reikningsár Landsvirkjunar skal vera almanaksárið. Reikningar hvers árs skulu gerðir upp og rekstrar- og efnahagsreikningar lagðir fyrir stjórn Landsvirkjunar eigi síðar en 15. mars árið eftir, ásamt umsögn endurskoðenda.

Stjórn Landsvirkjunar ræður löggiltan endurskoðanda til að endurskoða og staðfesta reikninga fyrirtækisins, en einnig er hverjum eignaraðila heimilt að láta endurskoðanda, sem hann tilnefnir, endurskoða reikningana. Endurskoðaðir ársreikningar Landsvirkjunar skulu, auk umsagnar endurskoðenda, lagðir fyrir eignaraðila til staðfestingar innan þriggja mánaða frá lokum hvers reikningsárs, ásamt ársskýrslu fyrirtækisins.

#### IV. KAFLI

##### 16. gr.

#### **Gjaldskrá, orkusölusamningar, samrekstrarsamningar og almennir skilmálar um sölu háspennts rafmagns**

Stjórn Landsvirkjunar setur gjaldskrá og almenna orkusöluskilmála fyrir fyrirtækið. Í orkusöluskilmála skal setja ákvæði um heimild Landsvirkjunar til almennra takmarkana á afhendingu rafmagns, um rekstrartruflanir og rekstrarstöðvanir og um skaðabótaskyldu og takmarkanir hennar.

Landsvirkjun gerir orkusölusamninga við almenningsrafveitur og iðjuver í samræmi við gjaldskrá sína (sbr. 13. gr.), almenna skilmála um sölu háspennts rafmagns og reglugerð þessa.

Landsvirkjun gerir samrekstrarsamninga við raforkuframleiðendur, sem tengjast stofnlínukerfi fyrirtækisins.

##### 17. gr.

#### **Opinber gjöld**

Landsvirkjun er undanþegin tekjuskatti, eignarskatti, stimpilgjöldum vegna lána, sem fyrirtækið tekur, eða vegna eignaafsala til fyrirtækisins, útsvari, aðstöðugjaldi svo og öðrum gjöldum til sýslusjóða og sveitarfélaga. Þó skal Landsvirkjun greiða til sveitarfélaga þau opinberu gjöld sem gert er að greiða af húseignum Landsvirkjunar skv. öðrum lagafyrirmælum.

##### 18. gr.

#### **Eignarnám**

Að fengnu leyfi ráðherra getur Landsvirkjun tekið eignarnámi vatnsréttindi, lönd, mannvirki og önnur réttindi, sem nauðsynleg eru til framkvæmda á vegum Landsvirkjunar. Um framkvæmd eignarnámsins skal fara eftir lögum nr. 11/1973 um framkvæmd eignarnáms.

##### 19. gr.

#### **Fjölgun eignaraðila**

Sýslufélögum, sveitarfélögum, samtökum þessara aðila og sameignarfélögum þeirra er heimilt að gerast eignaraðilar að Landsvirkjun með tilteknum skilyrðum eins og á er kveðið í 17. gr. laga nr. 42/1983 um Landsvirkjun. Komi til fjölgunar eignaraðila samkvæmt þeirri heimild eða með öðrum hætti, skal taka reglugerð þessa til endurskoðunar.

##### 20. gr.

Reglugerð þessi, sem sett er samkvæmt 20. gr. laga nr. 42 23. mars 1983 um Landsvirkjun og eigendur Landsvirkjunar hafa undirbúið í samráði við stjórn fyrirtækisins, staðfestist hér með til þess að öðlast þegar gildi. Um leið fellur úr gildi reglugerð fyrir Landsvirkjun nr. 115 frá 14. júní 1966, með áorðnum breytingum skv. reglugerð 202 frá 26. október 1971.

*Iðnaðarráðuneytið, 16. nóvember 1983.*

**Sverrir Hermannsson.**

*Páll Flygenring.*